

每週經課朗誦經文(巴克禮台語漢字)2012/12/23

共同經課 - 1

彌迦書五章二節～五 a 節

2 伯利恆以法他啊，你佇猶大諸個鄉社中做微細者，欲有一個對你選出來，佇以色列中間給我做掌權者；伊的根源對古早，對第一起頭就有。3 所以伊欲將in交互對敵，到生產的婦仁人生子。彼時伊所剩的兄弟欲倒來歸以色列。4 伊欲倚喲，倚靠耶和華的權能，及伊的上帝——耶和華威嚴的名，來飼伊的羊群。in欲安然倚起；伊欲做大，到地的極頭。5 此個人欲做咱的平安。

共同經課 - 2

路加福音一章四十六 b 節～五十五節

46 馬利亞講：47 我的心尊敬主做大；我的神因為救我的上帝來歡喜；48 因為伊看顧女婢的卑微；對今以後，萬世代欲講我有福氣。49 因為彼個有權能者，為著我做大的代誌；伊的名是聖。50 敬畏伊的人伊憐憫in，到代代。51 伊曾用伊的手出氣力；心志驕傲的人伊有趕散in。52 有權能的人伊搓(lut)in的位，卑微的人伊升in做高；53 枵的人伊用好物互in食到飽，富的人伊互in空空倒去。54 伊扶助伊的奴僕以色列，55 來紀念憐憫，照伊對咱的祖所講的話，來施落互亞伯拉罕及伊的後裔到永世代。

共同經課 - 3

希伯來書十章五節～十節

5 所以伊來入世間，就講：祭祀禮物你毋愛；你曾給我備辦身軀。6 燒祭及贖罪祭你無歡喜。7 彼時我講：你看，我來啦，我的事記載佇冊裡，上帝，我來是欲行你的旨意。8 頂面已經講：「祭祀及禮物，燒祭及贖罪祭，你毋愛，亦無歡喜（諸個是照律法來獻的）」；9 後來講：「你看，我來是欲行你的旨意」；伊是除去代先的，欲設立隨後的。10 佇此個旨意，對耶穌基督一擺獻身軀，咱得著成聖。

共同經課 - 4

路加福音一章三十九節～四十五節

39 佇諸個日的中間，馬利亞起身，趕緊去山地，到猶大一個城；40 入撒迦利亞的厝，請安以利沙白。41 以利沙白一下聽見馬利亞請安，胎孕佇腹肚內就趲跳。以利沙白互聖神充滿，42 就大聲講：「眾婦仁人的中間你得著福氣，你所懷孕的也得著福氣！43 我的主的老母來就近我，我對叨落會得著按呢啊？44 因為你請安的聲一下入我的耳孔，佇我腹肚內的胎就歡喜來趲跳。45 信的婦仁人有福氣啊！因為主所給伊講的話欲應驗。」